



# SAWA Oos-Kaap



## SAWA Boskamp Saamtrek: 26-28 April 2013

### Naweek nuus...

Na baie beplanning en reëlings wat getref moes word het die groot dag uiteindelik aangebreek,. Ek neem verlof die Vrydag en sorg dat ek voor almal by Komdomo is. Nadat ons opgeslaan en als reggepak het besluit ek en Tanya om te gaan stap en te kyk wat by Komdomo te sien is. Die eerste wie ons in die bos kom groet het, was 'n groot geel en bruin slang wat ook van die ander kampeerders elders in die kamp taamlik laat eenkant staan het.

Komdomo is 'n pragtige kampeerplek met al die nodige geriewe en beslis die moeite werd om weer te besoek. Die eerste van ons groep wat aangesluit het was Tjaart se broer wat al die pad vanaf Oos London gekom het om hierdie eerste (Tjaart het my tereg gewys 3de) boskamp van SAWA Oos Kaap te kon meemaak. Ons was 11 gesinne wat die Vrydagaand by Komdomo oorgeslaap het.

Saterdagoggend was daar vroeg, net na 6 uur, al rond geskarrel om alles in plek te kry vir die dag wat voorlê. Tjaart en Nelia het by ons aangesluit en na "brunch" het ons vertrek om die pragtige natuurskoon van die Baviaanskloof te kan geniet. Die pad was eintlik baie goed en ons kon lekker rondkyk en die natuur en wild waardeer.

Rooihoek, watter pragtige stukkie natuurskoon om te beleef. Daar was geen geriewe nie, slegs 'n "longdrop" wat baie vrouens eerder na die "porta" gedryf het. Verder bied hierdie oord 'n pragtige rivier met spierwit seesand in die middel van die berge, 'n asemrowende uitsig, en baie lekker speel- en swemplek. Hier het 'n vriend van Sieg en Charlie by ons aangesluit wat ons totaal op 13 gesinne te staan gebring het.

Na bykans 'n drie uur rit aan die 45 km tussen Kondomo en Rooihoek, was almal redelik moeg, en kon rustig ontspan, daar was selfs 'n klompie wat die rivier aangedurf het en lekker geswem het in die koue water. Die aand was daar lekker gekuier en saam gebraai, waarna die groter meerderheid maar vroeg gaan inkruip het, Vir die wat 'n bietjie later wakker gebly het was daar blykbaar 'n groot verrassing toe "n Bobbejaanmannetjie met 'n Landrover met een lig hulle kom optel het, om 'n groot "party" iewers in die berge by te woon..... Aldus Jacques Strydom en Steven Meyer.

Sondag oggend moes daar vroeg geroer word want daar is besluit dat Boekevat reeds 8 uur sal plaasvind, aangesien die roete na Willowmore ons ten minste 4 ure sou neem.

Daar is weer om 6 uur opgestaan en geskarrel. 8 uur is Boekevat gehou en ons het daarna vertrek en

verder die kloof verken. Ons was beslis nie teleurgestel nie want Kudu's en ander wildsoorte was volop, en ons stadsjapies kon ons vergaan aan die wild. Die roete vanaf Rooihoeke na Willowmore is asemrowend mooi en ook meer uitdagend vir jou voertuig, maar beslis nie nodig vir 'n 4 X 4 nie. Daar is kort, kort gestop om so die natuur beter te kon inneem na ongeveer 5 ure se ry was ons op Willowmore, en kon nou vinniger aanstoot om op Steytlerville te kom.

Op Steytlerville het ek vir ons bespreek vir 'n middagete, en almal het vir oulaas lekker saam geëet en gesels. Ongeveer 4.30 het ons dan almal klaar geëet en kon ons huiswaarts vertrek.

So is 'n baie lekker naweek afgesluit, wat ek glo almal wat saam was bitter baie geniet het, ja selfs Tanya, Michelle en Zeldrien het na my toe gekom en gesê, hulle het dit geniet en sal beslis weer saam op 'n boskamp gaan.



As toerleier wil ek dan net vir almal wat saam is baie dankie sê vir julle geduld en maklike inskakeling van sommige tyd veranderings wat ons aan die program moes aanbring.

Groete

*Jan Hugo*

